



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 10

Yangia anidakangma :

Tir Yimiyim

tiryimiyim@aolima

tir yimiyim

TAPAK 8

Dubai Para Badminton asayamung nung Pramod-i Gold 2 angu

UK nung alir ajunga dak COVID-19 tendangtsü sentong tenzüker

VOL. XVIII NO. 171 (ADOK 171) DIMAPUR

SANGTENNÜ (TUESDAY)

RONGCHII (APRIL) 06, 2021

₹ 5.00

COVID-19 Nagaland: Nisung 2 dak putet

Kohima, April 5 (TYO): Hombarnü Nagaland nung nisung ana dak COVID-19 aliba putet aser tena züngsema nisung ajak agi 12,365 kümogo.

"Tanü nisung ana dak COVID-19 putetogo. Dimapur aser Tuensang nung nisung kaka dak putet" ta Health & Family Welfare Minister, S Pangnyu Phom-i ashi.

Nisung 12,365 rongnungi 11,980 taneptsü nguogo aser tang 136 anepaludar, ta paisa metetdaksü.

Nagaland nung COVID-19 nung taneptsü angubaji 96.88% lir, ta Health & Family Welfare Director, Dr Denis Hangsing-ia ashi.

Tang tashi nung COVID-19 puteter nisung 91 süogo saka parnok rongnung nisung 10 bo tanga timtem ajanga asü. Maneni, nisung 158 tashi tanga state temi ogo, ta paisa ashi.

Tang anepalurtemji Kohima nung 123, Dimapur nung 11 aser Tuensang nung 2 lir. Ajisiüaka, parnok shinga dak-a shirangba yimya mali, ta Dr Hangsing-isa metetdaksü.

Nagaland nung COVID-19 alitsü akok ta temolung melemi bilemba sample 1,37,112 tendangogo. RT-PCR ajanga sample 75,570, TrueNat ajanga 37,541 aser Rapid Antigen Test ajanga 24,001 tendang, ta H&FW Director-isa ashi.

Nagaland district 3 nung ak kanga asür

Dimapur, April 5 (TYO): Mon, Kiphire aser Phek district tem nung ak aika asüba osang angashiogo anungji ak metsürtem aser public-i kanga kümdanga alitsü metetdaksür, ta Hombarnü AH & Veterinary Services Director, Dr Budhi Lama-i ashi.

Ak asüba osang tekaratiba nung Veterinary Health Centre dang sangoktsüsüla aser ak tasü mesüra ak shiranger indang shi machitsüla, ta Dr Budhi Lama-i sangdong ka nung

metetdaksüogo.

Paisa tangalen nungi osang tejangja memeteti ak aser ak techanu bener marutsü atema shiogo.

Ak metsürtemi ak metsüdak bio-security mapa inyaksüla aser Classical Swine Fever anema vaccine agüjang, ta Dr Budhi-isa ashi.

Ak metsürtemi hotel nungi mesüra endokenra chiyungtsütem ak nem mechidaksüsüla, ta paisa shisem.

Himanta Sarma-i COVID-19 mali ta ashiba sülen nisung 24 dak putet

Tinsukia, April 5 (Agencies): Tinsukia nung aliba residential school ka nung nisung 24 dak COVID-19 aliba putetogo. Deobarnü iba school nung kaketshir 14 aser watchman ka dak putet.

Assam nung COVID-19 mali aser masks enoktsü nungdak madoker ta Assam health minister Himanta Biswa Sarma-i ashiba sülen anogo ka lir iba ya atalokogo.

Nisung tasentem dak COVID-19 putetbaji Kasturba Gandhi Balika Vidyalaya school nung 25 aser tanga state nungi arur ka dena lir, ta district administration ketdangsür kati ashi.

"Onoki school nungi RT-PCR sample 43 benden. Parnok ya Rapid Antigen Test (RAT) nungbo negative ta putet saka tetsür kaketshir 24 aser watchman ka dak COVID-19 putet" ta ketdangsürisa metetdaksü.

Kasturba Gandhi Balika Vidyalaya school ya Tinsukia jila tezülen lir. Iba school nungsa

March 26 nü kaketshir 24, matron ka aser cook ka dak COVID-19 aliba puteta liasü.

Iba school nung matron dak COVID-19 aliba putetba sülen Health department nung IDSP cell-i school campus-i oa sample 87 tendanga liasü. Nisung 87

rongnungi kaketshir 24 aser cook ka dak positive putet. Iba ajanga RAT nung negative putetba nisung 43 indang sample RT-PCR ajanga tendangtsü molungtet, ta ketdangsürisa metetdaksü.

Anogo ana tejangdang, Kolkata nungi Indigo tayimtsü ajanga arur nisung asem dak Mohanbari airport nung tendangdang positive putet.

Tinsukia district nung nisung 8,073 dak COVID-19 putetogo aser iba nungi tang parnok 63 anepaludar.

April 3, 2021 nü Assam Health & Family Welfare Department-i Maharashtra o Karnataka state tem nungi aruba air aser train passengers-i negative RT-PCR report bener arutsü tetuyuba agüja lir.

Advisor Zhaleo Rio-i Dimapur nung COVID-19 maparen akangshitsü nenshir

Dimapur, April 5 (TYO): Sericulture, Excise & Minority Affairs Advisor aser DPDB Dimapur Chairman, Zhaleo Rio-i COVID-19 wara tanabubana nungi jenbua alitsü metetdaksü.

"India kübok Covid-19 wara tanabubana menateper anungji District Task Force Dimapur-i zübazülema melii Covid 19 azüoktsü atema maparen akangshitsüla. Covid-19 wara tanabubana agi Nagaland nungbo ano mekongshi saka asenok renema alitsüla" ta Zhaleo-i ashi.

Dimapur Deputy Commissioner aser DPDB Dimapur vice chairman, Rajesh Soundararajan-ia HODs dang Covid-19 wara tanabubana anema raratsü asoshi renema alitsü metetdaksü.

"Nagaland nung senzusenbongertemi süiba district ji Dimapur lir anungji asenok renema alitsüla. DTF Dimapur-i Covid 19 inyakyim

benoktsü aser DMC-ia dokan kiburtem dang Covid-19 inyakyim benshitsu atema mapa inyaksü tetuyuba agütsür" ta Dimapur DC-isa ashi.

Senden nung Advisor Zhaleo Rio-i DPDB Dimapur nung züngsem tasentem pelaa agizük.

Hombarnü Dimapur District Planning and Development Board senden nung o jembidang Zhaleo Rio-i Dimapur nung mapa inyaksü lemzüktüsbaji kanga tia taka aser ajaki pei tajungtiba agüja inyaksüla ta ayongzük.

DPDB senden ya district tajungba kümdaksütsü atema tebilemba aser shisatsü lemsateptsü asoshi külem sabang ka lir. Anungji, Dimapur district nung HoDs-i DPDB senden nung shilem tajungba agitsüla, ta paisa ashi.

Paisa Dimapur district nungi MLA tem dang DPDB senden nung adentsü mepishi.

Dimapur district kübok

Aspirational block atema Aghunaka shimogo aser iba atema tekaratiba nung luden ka tentetsü, ta Dimapur DC Rajesh Soundararajan-i ashi.

Hombarnü DPDB senden nung Rising Montessori School Toulazouma Village Dimapur, Sunrise Pre School 7th Mile Chumukedima, Riverine school Thilixu village Dimapur upgradation aser Quest Fulfill School Model colony Purana Bazaar Dimapur lapoktsü molunga agizükogo.

Maneni, senden nungsa Dhansiripar nungi Selouphe village-i Ebenezer High School aser Sovima F Khel nungi Kuda Nagarjan B Khel-i Logos School belentsüba agizükogo.

DPDB senden nung Advisor Zhaleo Rio, Advisor Tovihoto aser MLA Moatoshi nung den ketdangsürtem adenba atema pelar, ta Dimapur DC Rajesh Soundararajan-i metetdaksü.

ULFA(I)-i nisung tanabubana chiokogo

Guwahati, April 5 (Agencies): Hombarnü United Liberation Front of Asom-Independent (ULFA-I)-i Quippo company nung mapa inyaker nisung tanabubana chiokogo.

Nagaland kübok Mon district nung India-Myanmar arrtsü anasa Ram Kumar chiok.

Arunachal Pradesh kübok Changlang district nung arishi küm 51 tain Pranab Kumar Gogoi chiokba sülen anogo ana lir ULFA(I)-i arishi küm 35 tain Ram Kumar chiokogo.

Nagaland kübok international arrtsü anasa Ram Kumar chiokba osang ya Mon Deputy Commissioner, Thavaseelan K-i jangjatsüogo.

Külen, Changlang deputy commissioner (DC) Devansh Yadav-ia Nagaland nung Tizit police station kübok Kumar chiokogo, ta osang metetdaksüogo.

"Pa ya Assam Rifles ket nung

agütsü aser Tizit police station-i anir ogo. Changlang nungi police telok ka Mon district-i yokogo" ta Yadav-isa ashi.

"Police telok kati Ram Kumar dang asüngdangyatsü aser pa temang tendangtsü. Iba sülen pa Bihar nung par kidangi yoktsü. Mon nung maparen ajak tembangra, Mongulbarnü pa idak nung jagi dang Bihari-i yoktsü. Yamaji mesütetra tamasa Changlang-i anir arutsü" ta Changlang DC-isa metetdaksü.

"Kü kinungbo chiokba atema ni Centre, state aser Assam sorkartem dang pelar. Tanurtemia tebu aruba osang angashia kanga pelateper" ta Ram Kumar kinungtsü Bina Kumari-ia osangbener dang ashi.

Quippo Oil and Gas Infrastructure Limited nung Ram Kumar ya radio operator aser Pranab Gogoi ya drilling superintendent ama inyaker. Tena ya December 21, 2020 nü

Changlang district kübok Kumchaika drilling site nungi pur ao.

April 3, 2021 nü Assam Rifles patrol team kati arrtsü anasa Longvi yimtsing nung Gogoi angu.

"Tena pur aoba sülen ita ana shi lir külen tena tesembalala nung ayu ta onoki tena dang nungi angazükogo" ta Changlang SP Mihin Gambo-i ashi.

ULFA-I-i Quippo company dang tena chioktsü atema Rs 20 crore meshi aser February 16, 2021 tashi nung senji agütsütsü mapang latettsü.

Senji magütsüra tena tepsettsü ta ULFA(I) commander-in-chief Paresh Baruah-i amokmerena liasü.

Ajisiüaka, Assam nung shisashirtem aser nübortemi iba inyakyim anema ola adokba sülen ULFA(I)-i tasüba agi merenshitsu ta ashiba meyipa agi aser Assamese lanur nem mapa 5,000 adoktsüra tena chioktsü ta o melena liasü.

Class 9 & 10 kaketshirtem 'aptitude test' agitsü: NBSE

Dimapur, April 5 (TYO): Ministry of Education, Government of India-i State Board tem dang Class 9 aser 10 kaketshirtem atema aptitude test agitsü tetuyuba agütsüogo, ta Nagaland Board of School Education (NBSE)-i metetdaksü.

Iba aptitude test ya TAMANNA (Try And Measure Aptitude And Natural Abilities) lir aser National Council of Educational Research & Training (NCERT) o Central Board of Secondary Education (CBSE) ajanga renem.

Iba aptitude test ya kaketshirtemi educational/vocational courses den career dak sendakba telemtetbatem agitsü atema lir, ta NBSE-i ashi.

Test Booklet nung Language Aptitude, Abstract Reasoning, Verbal Reasoning, Mechanical Reasoning, Numerical Aptitude, Spatial Aptitude & Perceptual Aptitude indang onüktem dena lir. Ano, tesayurtem aser tsüraburtem atema guide aser Technical Manual dena lir.

Maneni, School Principal aser tesayurtemi tali angatettsü atema

video ana renema lir. <https://ncert.nic.in/tamanna/index.html> nung soft copy (pdf) aser video tem angutsü.

Iba aptitude test agiba osang school temi tamanna.ncert@ciet.nic.in nung National Council of Educational Research & Training (NCERT) dangi indangindanga yoktsü akok, ta NBSE-i metetdaksüogo.

Nagaland nung school ketdangsürtemi Class 9 aser 10 kaketshirtem atema iba aptitude test agitsü mepishir, ta parnokisa ashi.

BJP Minority Morcha ajanga COVID-19 Help Desk amenok



Dimapur, Rongchii/April 05 (TYO): BJP Minority Morcha indang national president Jamal Siddiqui den shisa agitepa State Minority Morcha BJP Nagaland ajanga Dimapur, Kohima, Mokochung aser Phek district tem nung aliba vaccination centre nung COVID-19 Vaccination Help Desk amenokja liasü.

Iba sentong ya Khevishe Sema(State General Secretary & Incharge State Minority

Morcha) aser Deep Kumar (President, State Minority Morcha) na lenisüba kübok district president, in-charge aser züngsemtem den volunteers temi yaritepa ayongzüka liasü, kong teintet rogo aser teyari nungdaka alirtem nem teyari agüja liasü.

Iba mapang parnoki "Seva hi sanghathan" omen kübok nüburtemi COVID-19 mozü dak sendakba nung mashi angatetba aser tsübua bilemba

indang tim lenmang nung rateta shia awareness agüja liasü.

Dimapur, Kohima, Mokochung aser Phek district kübok Help Desk ya Urban Primary Health Centre (UPHC), District Civil Hospitals, Naga Hospital amala Vaccination Centre tem nung amenoka liasü.

Mozü agütsüba maparen nung yaritepba atema medical team aser ketdangsürtemi pelaba lemsatepa liasü.

Mon kitsük-kirong lendong nung ki 20 rongdok



Dimapur, Rongchii/April 05 (TYO): Tamong village, Mon town nung kitsük-kirong lendong ataloka lir ta April 02, 2021 nü nikongdang 5:06 ako nung osang aruba sülen Fire Station Mon nungi Fire & Emergency Services team ka mi ya remseptsü asoshi oa liasü.

Iba mapang Fire Tender ana den hadir aser Fire Personnel teberi oa mi ya remsepa liasü. Iba mi lendong nung ki ka den sen lakh 15 shi jenjang oset-tsüset rongdoka liasü.

Iba lendong nung sen lakh 20 shi indang oset-tsüset rongdoktsü aliba nungi kumzükteta liasü. Mi ya electrical short circuit nungi tenzüik südi, ta temolung melemi lir. Mapang shidak nung telangzüba agütsüba ajanga mi ya temeket nung aliba ki nung kaoloka aotsü aliba nungi nokdangtet.

Fire Personnel temi iba mi ya minute 40 shi nung remseptet. Mibener ya Duty Commander SI Soyhunlo Kent-i anir oa liasü.

Maneni Totok Chingha, Mon nung kitsük-kirong lendong adoka lir, ta April 03, 2021 aonung 10:44 ako nung osang ka aruba sülen Fire Station Mon nungi Duty Commander ASI Chingpai Konyak-i anir Fire & Emergency Services team ka mi ya remseptsü oa liasü.

Iba lendong nung sara/azüki 19 tashi rongdoka liasü aser sen lakh 50 shi jenjang oset-tsüset aoyi kuma rongdoka liasü. Mibener mapang shidak nung maru asübo ano sen lakh 20 shi jenjang oset-tsüset rongdoker lila, ta sangdong ka ajanga ashi. Mibener temi aonung 11:26 ako nungi anepdang 7:00 ako tashinung ang mi ya remsepteta liasü, ta ashi.

First Gate Ward-2, Chümoukedima nunga kitsük-kirong lendong adoka lir ta April 01, 2021 nikongdang 2:51 ako nung osang aruba sülen Fire Station Chümoukedima nungi Fire & Emergency Services team ka mi remseptsü oa liasü.

Mibener tem hadir tabensa bener mi ya remseptsü merang saka iba lendong nung ki ana den sen lakh 4 shi jenjang yangji aliba oset ajanga rongdoka liasü.

Mi ya electrical short circuit nungi tenzüik südi, ta temolung melemi lir. Iba mi remseptsü asoshi ketdangsürtemi minute 20 shi agia liasü aser parnoki mapang shidak nung telangzüba agütsüba ajanga temeket nung mi kaoloka aotsü aliba nungi jenbua liasü.

Mibener ya Duty Commander ASI Haitilo Semy-i anir oa liasü.

Tang tensa nung Naga nunger ajunga lungjemtsü nungdaker: T.R Zeliang

Dimapur, Rongchii/April 05 (TYO): Nagaland Legislative Assembly nung opposition lenir, T.R. Zeliang-i April 5, 2021 nü Peren distric kübok Lamhainamdi yimtsüng semdang aser March 22, 2021 nü prangbong bena alirtemi taochi mesayui tepseter nisung asem nem akum agüja liasü. Iba sülen Rev. Kuzierang Thou-i sarasadema liasü.

Lamhainamdi yimdak tai maket nisung asem tepsetba ya Naga nunger aser Peren nung aliba District Administration aser sepaitem mesüshiba lir, ta T.R. Zeliang-i ashi.

Pai nüburtem dang iba yimtsüng indang puti otsü

bilemtettsü aser pei temeden wazüka yua iba atema nokdaktüsü ayongzüka liasü.

Aibelener tejangja aputsü ya ajak tebilemtsü lir, anungji tekeratiba nung aibelener aputsü asoshi nübür ajak ka kuma lungjemer Administration aser Police den yariteptsüla, ta pai ayongzüik.

Paisa aibelener nem tapet temerenshi agütsütsü imlaba lemsatep aser mangyimer kibong asem den asükhu lemsatepa liasü.

Leader of Opposition ya meina Peren District Administration, Police Personnel, Civil Society tem oa liasü.



Deputy Commissioner, Dimapur indang Conference Hall nung April 5, 2021 nü Simapur District Planning and Development Board senden amenba mapang tangokba noksa ka yangi angur. Noksa nung Advisor Zhaleo Rio aser Tovihoto aser MLA Moatoshi den DC Dimapur aser HOD tem angur.

Tanü Assam election nung security forces company 320-i anüktsü

Guwahati, Rongchii/April 05 (Agencies): Assam nung Assembly election noklem asembuba aser tatembangba maparen tajungtiba nung agitettsü nükjidong nung security forces company 320 tashi yoka lir.

Item company ya Central Armed Police Force (CAPF), Assam nungi aser danga state tem nungi State Armed Police (SAP) tem meyokteper alitsü.

Strong room nung company 30 tashi agi tanükba agütsütsü aser tanüingba company tem ya tensa azüokba maparen nung nokdaktüsü.

Tensa azüoktsü asoshi polling station shia constable ka den Home Guard kaka yoktsü.

Iba dak alia state nung security tensa ya sector aser zonal police officer temi mita reprangtsü.

Mongulbarnü agitsü aliba election nung vote agütsütsüpur nisung 79,19,641 lir, aser item

rongnung tebur 40,11,539, tetsür 39,07,963 aser transgender 139 lir, shirnoki district 16 kübok constituency 40 nung auxiliaries 1817 densema polling station 11,401 nung pei vote agütsütsü.

Assam assembly election phase tasembuba nung tokteper candidate 337 lir aser item rongnung tetsür 25 dena lir.

Election phase tanabuba agütsüba mapang tesem kar nung timtem ajuruba aser EVM mapa shidak meinyakba ajangshia lir.

Ajidang masü Patharkandi Krishnendu Paul nungi BJP candidate indang gari nung electronic voting machine (EVM) belenba indang noksa aser video tem temai adoka prokshia liasü.

April 1 nü election agiba mapang Cachar district kübok Sonai constituency nung polling booth ka nung police temi injang khashishiba mapang nisung asem yirua liasü.

GPRN/ NSCN ajanga asükhu lemsatep

Dimapur, Rongchii/April 05 (TYO): GPRN/NSCN nungi Deputy Kilonser Hetozu Zhimomi April 03, 2021 nü asüba atema mang ayimer, ta GPRN/NSCN indang MIP ajanga sangdong ka nung ashi.

Sukhato village, Sumi Region nungi asür Akiye Sumi'er jabaso asür Hetozu Zhimomi, Deputy Kilonser ya linük tenzüikba wadang nung November 3, 1991 nung tenüing zülüoka liasü aser pa tasünü tashi linük tenzüikba wadang nung liasü.

Pa asüba ajanga GPRN/NSCN nung teyakyak aser wainshin aketba temeranger sepai ka samaogo. Pa mapa nung benedanga agütsür

tenzüikba asoshi jangja metetba kisüng masü saka pa dak temeim agi sünga liasü, shibai Naga nunger tejangraba nung tamang yur tenzüka liasü, ta sangdong ajanga ashi.

Pai Naga lima asoshi inyakba aser pa tsüngsü teti mesamai alitsü aser Naga nunger puti otsü nung zülüoka ayutsü.

GPRN/NSCN ajanga mangyimer kibong den asükhu lemsateper aser Tulusang Tsüngremi tesunep aser anisüngzüik agüjang ta sarasademtsür.

Asür tanüla teti tatem maka tesunep nung anisüngzüikjangma, ta sangdong ajangasa ashi.

Arunachal nung Galo nungeri Mopin benjung among Dima Hasao polling booth nung votes talila enok



Basar nung Mopin benjungmung nung Galo tetsürtemi Arunachal Pradesh chief minister Pema Khandu tejak nung jang tonger mezüja agizükba angur. (Lepa-Rada, April 5)

Lepa-Rada, April 5 amunger. (Agencies): Hombarnü Lepa-Rada district kübok Basar nung Galo nunger Mopin benjung nung Arunachal Pradesh chief minister Pema Khandu aden. Basar moapu nung Galo tetsürtem pei kin sobutsü meraketa sobur, chief minister Pema tejak nung jang tonger mezüja agizük. Iba ya Galo kin indang sobaliba inyakym ka lir. Mopin ya Galo kin indang aluyimba benjungmung ka lir aser tangba mongpu mapang parnoki iba benjungmung

Iba sentong nung, Khandu-i, temesüing indang benjungmung Mopin ya tesünap, yimjiyimjung aser meshitetba temaitsü sayur aser iba benjungmung ajanga kija shia taküm nung tesünap bener arutsütsü imlar, ta ashi. Basar nung chief minister-isa "Mopin Joy Ride cum Awareness ride 2021" tenzüksü. Iba cycle rally nung India tesem balala nungi cyclist 20 agi shilem agiogo. Arunachal Amateur Bicycling Association

ajanga iba cycle rally sentong ayongzük. Taruba anogo ishika atema cyclists team yagi Lepa-Rada district ajanga senzütsü. "Tanü #Basar nung Arunachal Amateur Bicycling Association (AABA) ajanga ayongba #MTB #Mopin Joy Ride Cum Awareness Ride 2021' tenzüksüogo. India ajunga nungi cyclist 20 agi iba sentong nung shilem agidar aser parnoki #Leparada district ajanga senzütsü," ta Twitter ajanga Pema Khandu-i lemsatöp.


Arunachal nung Model Treatment Centre tanabuba lapokogo

Itanagar, April 5 (Agencies): Arunachal Pradesh health minister Alo Libang-i state nung Model Treatment Centre (MTC) tanabuba lapoktsüogo. Iba Centre ya Bakin Pertin General Hospital, Pasighat nung National Viral Hepatitis Control Programme (NVHCP) kübok yanglu aser Honibarnü lapokogo. NVHCP ya July 2018 nung Union health ministry-i tenzüksü sentong ka lir. 2030 tashi nung India nung viral hepatitis samatsütsü nükjidong nung iba ya tenzüksü, ta Minister Libang-i ashi.

"Arunachal state sorkari Health atema kanga tongti süa bilemer aser iba jagi India sorkari tenzüksü sentong ajak state nung mapa küma inyaktsü meranger. Iba Model Treatment Centre lapokba ajanga hepatitis agi shirangertem nem diagnostic facility agütsüba den angati anepalutettsü" ta paisa metetdaksü. Iba alizüngji atongtsü atema doctor aser health worker ajaki külemi molungsoa mapa inyaktsü mepishir, ta Minister Libang-isa shisem. NVHCP tenzüksü ajanga state kübok anüdok tsütsü

hepatitis agi shirangertem screening, diagnosis, aser management tajangzük balala angutsü, ta Health Services director Dr M Lego-ia metetdaksü. Iba sentong nung State nodal officer for NVHCP, Dr L Jampa-i power-point presentation ajanga NVHCP indang osang lemsatöp. Sentong nungsa T&RC joint director Dr Dukhum Raina, East Siang district medical officer Dr Kaling Dai, medical superintendent Dr Y R Darang aser BPGH nung doctor, nurse aser health worker tem aden.

Taoba DIG Hiranya Bhattacharya süogo



Hiranya Kumar Bhattacharya

Guwahati, April 05, 2021 (Agencies): Nüngtugu kakot zülur aser Assam Border Police indang taoba deputy inspector general (DIG) Hiranya Kumar Bhattacharya Hombarnü Guwahati nung nija mozüki ka nung asü. Hombar anepdang 4:30 ako meta iba mozüki nung Bhattacharya taküm

Assam Agitation pusema Assam Police anema noktakba atema 1981 küm National Security Act (NSA) kübok Bhattacharya ya 'preventive detention' nung ayu. Ibaji ajanga police force nungi pa anentsü. Ajisüaka, Bhattacharyya-i pa mapa nungi anentsüba anema okadak ken o benok aser 1996 küm pai iba

ken o nung takok angu. 'Mukti Bahini' indang batch ana training agiba den Bhattacharya tesendaktep takang aliba yong Bangladesh linük balaka razüka aoba maparen nunga pai tongti shilem agiogo. Iba atema 2013 küm Bangladesh sorkari Bhattacharya nem 'Friends of Liberation War Honour' naroküm agütsüogo. Bhattacharya-i züluba nüngtugu kakot - 'Betrayal of North East: The Arrested Voice' aser 'Operation Lebensraum - Illegal Migration From Bangladesh' nung pai timtem balala ajangshiba indang shia lir. Assam Movement nunga pai tongti shilem agiba ajanga pa anaben tashi tepuokdaki iogo.

Haflong, April 5 (Agencies): Assam kübok Dima Hasao district nung polling booth ka nung vote enoktsür nisung 90 dang züluoka lir sernung nisung 171-i vote enoktsüogo. Iba ya Haflong constituency nung polling station ka nung atalok aser April 1 nü election shilem tanabuba nung dena liasü. Iba osang metetba sülen District Election Officer-i polling booth nung election ketdangsür 5 mapa nungi anentsüogo aser repoll asütsü shiogo. Iba polling booth ya 107(A) Khotlir LP School nung lapok aser April 2 nü Dima Hasao nung Deputy Commissioner-cum-District Election Officer-i ketdangsürtem mapa nungi

anentsü. Election Commission-i "dereliction of duty" nung ajemdaker Seikhosiem Lhangum (Sector Officer), Prahlad Ch Roy (Presiding Officer), Parameswar Charangsa (1st Polling Officer), Swaraj Kanti Das (2nd Polling Officer) aser Lalzamlo Thiek (3rd Polling Officer) nungertem mapa nungi anentsü. Iba polling station indang voters' list nung nisung 90 züluoka lir saka Electronic Voting Machine (EVM) nung votes 171 enoktsü. "Iba yimtsüing nung tanishiri voters' list magizük aser pa indang voters' list bener aru. Iba sülen yimdaklirtemi iba voters' list nung aliba ama vote enoktsü" ta ketdangsür kati ashi.

AR-i Siahatala yimtsüing nung awareness campaign ayongzük



Aizawl, April 5 (Agencies): Hombarnü 23 Sector Assam Rifles indang Lunglei Battalion-i Mizoram kübok Siahatala yim nung anti-malaria awareness campaign ayongzüka agiogo. Iba campaign mapang shisalen sayurtemi malaria anepalutsü aser iba tashidak nungi kümzüka alitsü asoshi tekümdangtsü mera agitsü indang telok dang metetdakja liasü. Iba sentong nung nisung 45 aser Assam Rifles nungi teshimtet nübu 23 agi shilem agiogo. Hombarnü 23 Sector Assam Rifles-isa Aizwal kübok Thutak Nunpuitu Team (TNT) Orphanage nung tanurtem asoshi dental camp ka ayongzük. Iba health camp agiba mapang doctor temi Orphanage nung alir tanurtem tepo anepalu aser parnok dang dental health indang tongtibangtem metetdaksü. Manmohan Singh-i anir medical team kati tanur 200 tashi anepaluogo. Maneni tanga sangdong ka ajanga ashiba agi, 23 Sector Assam Rifles indang Serchhip Battalion-i Mizoram indang Serchhip district nung Veer Naris (widows of armed forces personnel) semdanga parnok kibong nungittsü asoshi nüngdakba osettsüset tem agütsüogo. Tang ama Covid-19 wara tensa tamajungdang nungittsü

asoshi Assam Rifles-isa linük asoshi taküm agütsür sepai kibongtem nem teyari agüja liasü. Assam Rifles jawan team kati Veer Naris - Juliet Zongmawii aser Laldengi na semdang aser tena nem nüngdakba osettsüset tem lema agütsü. Zongmawii aser Laldengi naprongla New Serchhip tesem nungi lir. Assam Rifles-isa, nüngdak adokba mapang parnok (Veer Naris) nem teyari agütsütsü ta nangzüka liasü. Kasa mapang, 23 Sector Assam Rifles indang Lunglei Battalion-i Siahatala kübok Tuipang tesem nung mapa nungi anener alir armed forces tejen aser mapa nungi anener alir Central Armed Police Forces (CAPF) personnel atema Ex-serviceman Rally ka ayongzük. Iba rally mapang, ex-servicemen indang metokmetem asadangshia jembi aser item timtem pungbadaktsütsü asoshi tim maparen inyaktsütsü asoshi Assam Rifles-i nangzüka liasü. Mapa nungi anener alir sepaitem den ajurutepa aser Centre o State Sorkar ajanga agütsüba facility tem aser sorkar mapatong tem meteta lidaktsütsü nükjidong nung, Assam Rifles-i iba sentong ayongzük. Iba Ex-serviceman Rally sentong nung ex-servicemen 16 nem tenüngsang agütsüogo.



TIR YIMYIM YIMOBILEM (EDITORIAL)

DIMAPUR SANGTENNÜ, RONGCHII (APRIL) 06, 2021

JEMBIBA AMA ALITSÜLA

Pei jeminütsü jembitsü yabo temela aser lokti nung tajungshi o jembitsü aser sayutsüngitsüa tasakbo masü saka nisung kati peii jembiba ama pei taküm aser mapa nung shitak lia oa sayutsübjibo mapa temela masü. Aji oda, kidang tsürabur kati peii jembiba ama tanurtem tsüngdang alitsü aser lokti aser yimten nunga lenir kati peii jembiba ama mapa agia nübortem dang inyaka sayutetsübjiang tang aser tarutsü putu asoshi kanga tongtibang lir. Ibaji kodang tang asenoki ajuruba tensa nung asenoki jembiba o aser mapa na medemdangdir, asenoki asenoksasa asenoki jembiba ama malir ta angatetsü. Yimten nung yimsüsürtemi Covid-19 wara nungi kümzüka alitsü asoshi teni-tebang ajak nembanga mask agitsü, teti sapon agi teka metsüktsü aser lokti tulu mesentepi pilaa alitsü merangtsü atema teinyaktsütem ozüng küma yanglur agütsür. Ajisüaka, asenoki yimten aser lokti nung yimsüsür aser tanishirtem inyaksangshi reprangdangra, parnok aikati mask magir, tekabo memetsüker saka salemba ajak den salemyonga aoer aser telok tulu adenshitsüsa parnokiang benjong tulu ayongzüker. Ano, tang Assam nungbo tangari masü saka medical minister-bai beauty parlour-tem takoksa maludaktsütsü atema nübortem dang mask agitsü nungdak madoker ta yimjak nung ashibaji tangatetsü tasak. Tang ya India state aika nung Covid-19 wara mopong tanaben kanga mejungi süiba osang lir. Iba jagi tesem kar nungbo yaküm küm shibangba ama nübortem sademsadema mesenzütetsüsa inyaksangshi mapatem shibang tenzükdagi. Iba jagi beauty parlour-tem dang masü saka aluyimertem aser tanga business inyakerkem ajak kanga akoksatsü. Ajisüaka, tangar temetetertemi ashi medem, tang ama alima ayimsünga tashidak wara süiba mapang yabo senotsü aser ali rongsen nung akoksabajibo takoksa masü saka taküm danga kümzükra ojang ta angateta peisasa pei azüoka alitsüba mapang lir. Talisa, Covid-19 wara yagi meshirang tashi Covid tashidak wara mopong mali ama bilema zübazübaa alitsübjai masü, saka tang ama Covid-19 wara agi aika dak mekongshidang mekongshidaktsütsüsa nokdangtsübjiang tongtibang lir. Cancer tashidaka asenok dak matong tashibo asenoki asen dakbo matongtsü amai bilemer saka komakaser asenok khen mekümdanger ta asü dang asenok taküma menepdaktsür. Aji oda, cancer tashidak agi tonger anepalutsübjai masü saka cancer agi meshirangtsüsa nokdangtsübjai tongtibangba ta shinür. Iba denji kasa Covid tashidak agi tonger anepaluba dang nungibo tashidak agi asen temang memenepdaktsüi nokdang tajungba ta angatetsüla. Assam medical minister-bai pai anir ano khen timtem agia tangsa tekümdangba kümdanga alitsüsa nübortem ajungshitsü melen, Assam nungbo Covid maliji mask agitsü menügdak ta ashiba jagi Assam nung dang masü saka asenok Nagaland nung alir dena lendongi aitsü, kechiyong Assam election temli nisung lakh junga Nagaland-i meyipa arutsü. Ashiko, election mapang asüba agi beauty parlour lapoka alirtemi anung marem, pai ashi asütsüa akok saka lenir kaji lenir, anungji akok tashi shirnok akoksar aser shirnok ajangzüker ta masü saka kechi shitak aji jembitsüla aser jembiba ama mapa agia inyaka sayutsüla. Atangji, talisa tatsük talem nung shibaibo mask aginütsü saka magi majunga ta sayutsü atema lenirtemibo agitsüla, aji asünung dang nübortemia agitsü. Tanurtemi tsüraburtemi parnok dang kechi ashi ta masü saka parnok koma alir ta reprangba ama; yimten, lokti aser arogo nunga lenirtemi koma jembir ta masü saka koma lia sayur aser koma inyaker ta nübortemi repranger. Aji oda, mask agitsüla, teben shidoktsüla aser lokti nung kati ka dak kongshitsüsa malitsüla ta ashir süra, timtemaka yamaji inyaksüla aser asenoki ochishia alitsüla ta tajungshi o jembiba senzür süra, asenok tama ochishia lia sayutsüla.

OLEMSABANG MYANMAR NUNG KECHI ATALOKDAR

~ Rev. Alem Lemtur, Pastor, Delhi (Osang Zülur)

February 1, 2021 nü Myanmar Military Coup asüba nungi tenzüker tawa tashi nung Buddhist majority sepaitemi Myanmar nung aliba ethnic minorities aser Khristantem amokmerena rishikangshiba dang masü, saka ita ana nung joko nisung 530 tema tepsetogo aser nisung jenti yiruogo. Iba tensa tamajung ka nung nübortem kanga timtem aser terokong tia nung lir, saka linük aser nübör meimertema aika lir, aser parnoki sepiatem anema kanga meranga raradagi. Anungji iba tensa tali tejangjaba nung angatetsü, aser India nung aliba amangbapurtem den khuret lemsateptsü atema "Myanmar Nung Kechi Atalokdar" ta asüba onük nung ajemdaker April 2, 2021 nü online Special Symposium ka Yanglushidi Sensaksem Sabang (YSS)-i North East Christian University (NECU) ayongsemer iba 'symposium' kanga takok ngua alia liasü. Myanmar nungi Tongi O Jembirtem parnok pezü jaoka liasü, aser item nübortem liasü: (i) Shri Salai Isaac Khen, Former State Minister of National League for Democracy (NLD), Yangon (ii) Dr. Seng Ja, Civil Disobedience Movement (CDM), Kachin State lenir ka, aser (iii) Tedim Christian College, Yangon nungi Professor ana, Dr. Mang aser Dr. Piang shilem agia liasü.

Dr. Wati Longchar-i YSS aser NECU tenüng nung tatener ajak pelaa agizük, aser okila nung tawa Myanmar nung military coup sülen majority Burman sepaitemi koma Naga nung aser tanga minority kintem rishikangshia tepsetba indang lemsatep, aser India Democratic tetsüdi ka asü nungji nübortemi shimba lenir atsüngdokba aser nübortem tepseta rishikangba anema Indiai ochi yimyim agütsütsü nungdaker. Sendong metenzükdang asürtem nem akümtsübu agüja tatener ajaki second 10 ajem-ajema ata. Iba sülen Tongti o jembirtem pai tejak-sayu, aser parnok 'symposium' nung tentetba atema pelaba metetdaktsü.

O Jembirtemi nungi tongtipang tangazükba kar yamai lemsateper:

Military coup anema Myanmar nung amangbapurtemi item meratem agir: (i) Iba anema jembir aser zülur, (ii) Lenmang nung adoka ayimtener (iii) Sarasadem aser mapa külemi aor, tat. agi, lenmang nung, tenlakidang aser online sarasadem, aser pei talidak ki raksar alirtem aser jenshia alirtem nem teyari agütsür, (iv) Efesa 6:12 nung ajemdaker iba ya 'political parties' tsüngda rara masü, saka ochi asoshi raraba ka lir.

Military coup anema Cardinal Charles Maung Bo-i February 3, 2021 nü 'Roman Catholic's Statement' agütsü, Myanmar Baptist Convention-i 'Statement on Military Coup' February 5, 2021 nü agütsü, Methodist Church (Upper Myanmar)-i 'Statement on Military Coup' February 7, 2021 nü agütsü, Association For Theological Education in Myanmar-i February 11, 2021 nü 'Statement on Military Coup' agütsü. Tamang telok ajaki lokti mulung yimden anema inyakba aitsü, lenirtem tepokdak aliba chioktsüla, aser azü tokshia tashiyim nung yinjang yokba aser Civil Disobedience Movement tim aser Khristantem atener ta ola agütsü.

April 2, 2021 tashi nung Myanmar nung sepaitemi civilian 530 tema tepsetogo (Yangon-149, Mandalay-165, Sagaing-41, Thaninthari-28, Shan-24, Pegu-24, Magway-23, Irrawady-10, Kachin-10, Mon-7, Nayyidaw-3, Kayah-1). Anogo shia tai maketba nübör aika tepsetdaki aser nisung merijang aika tekümütsü bushi Thailand aser India jena arudagi.

Arogotemi Myanmar nübortem den külemi nokdaktsü, aser temenen anema temeshi, aser mamangba anema tamangba-i takok mangu tashi meneni raratsü.

Nübortem dangi yimjung, ochi-obendangba, tashi, aser democracy meyipa maru tashi North East India nung aliba adianutemi Myanmar nübortem yaritsü ajungshir.

Ken yongi meimlai liasü, saka nübortemi Civil Disobedience Movement (CDM) tenzüka lir, aser ibaji kanga tashi ita odagi, aser Myanmar Sorkar mapatem aika anendaka lir.

North East India state-tem, talisa Nagaland, Manipur aser Mizoram nung CDM nung atenerkem jenokdaktsüba atema pelaba metetdaktsü.

Tawa Myanmar sepaitemi 'coup' asüba ya 'unconstitutional,' aser tai.

NLD aser Committee Representing Pyidaungsu Hluttaw (CRPH) ajanga inyakbatem kar: (i) Foreign Relations Committee ka tenteta international Community den tongtep rateper; (ii) Tanga lokti, aser kintem den tesendaktep yanglur; (iii) 'Street protest committees' aser 'activists' den tesendaktep yanglur; (iv) Federal Democracy Charter ka yanglur agizüka lir, (v) Military coup anema, aser tang aliba Constitution melentsü atema telok karibo prangpong amer raratsü tenzükgogo, saka yimjung bener arutsü meji UN teyari temeshidak lir.

College nung tesayur aser CDM lenir kati Military coup, aser Kachin yim ka nung tashiyim agi Buddhist tenlaki (Pagoda) yanglutsü tenzüka anema nokdakba ajanga March 13, 2021 aonung 10:45 ako nung Kachin Theological College and Seminary-i sepaitem talongtsü 15 nung arua la aputsü merang, saka Dr. Seng Ja jenpoba indang kuli agüja liasü.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

ABAM Social Concern Sensitization sentong takok ngua agiogo



Impur (Mokokchung), April 5 (TYO): April 05, 2021 nü Mopungchuket Baptist Arogo nung ABAM Social Concern Sensitization sentong takok ngua agiogo, ta ABAM Executive Secretary, Rev. Dr. Mar Pongener-i sangdong ka nung metetdaksü.

Arogo nung tenzükertem, yimten yimsüsürtem aser telen balala nungi nisung 60 shi arua iba sentong nung dena liasü.

Lokti tebilemtsü koda anepalutsü ta sensaksemba mapang nung tang rongdak tebilemtsü Yi tongpang, election merükteta agitsü aser ozüing

anema sen apotsütepa maparen yabo Arogo, yimten aser lokti telen ajak külemi inyak nung dang akoktsü asünung lokti ajaki temulung aguja inyaktsüla ta jembia liasü, ta sangdong nung shia lir.

Pei yimtsüing nüburtem asoshi Arogoi maneni rongsen, nübo aser shisatsü endok mesasai sentong balala agia nüburtem asoshi nungdakattem reprangteta peridakja yaritepra tebilemtsü aika nungi kümzüka alitsü, ta lemsatöp.

Item mapa takok ngua inyaktsü asoshi tanü sentepba lokti mapang shia shisatokden

senden agitsü tongtibang ta bangjema liasü.

"Mopungchuket yim ya libajen kümzüka ayuba yimtsüing rongnung yakpang süa nendaka inyakba yimti ka lir, anungji ajaki yamaji telungjem nung inyakra mapa aisü nung asenoki takok angutsü. Maneni arok shilem, ta tangatetba nung lokti ajaki külemi teka amteper inyaka aodang Tsüingremi takok agüjang ta ABAM-i sarasademer. Mopungchuket Baptist Arogo dang iba sentong tajungtiba nung achaayangba asoshi pelaba lemsateper," ta kasa sangdong ajanga metetdaksü.

Pope-i benokba onüktem inyaktsü atema Iraq sorkari luden ka tentet

Rongchii/April 05, 2021: Taküm March ita nung Pope Francis-i Iraq semdangba mapang nung pai benokba teilemtsü onük balala atema inyaktsü asoshi Iraq sorkari inter-ministerial committee ka tenteta mapa lemzüksüogo, ta International Christian Concern (ICC) osang ajanga metetdaksü.

Sorkari tentetba Inter-ministerial committee jagi linük nung security, rongsenkettsüing terenlok aser infrastructure atema inyakba den külemi Iraq nung Khristantem tebilemtsü onük balala atema inyaktsü ta osang angazüker.

Iraq kübok Nineveh Governorate nung aliba Khristantemi anogo shia amokmeren ajurur, kechiyong telungpurtem aser Muslim kiralongrartemi timtem agütsüba dang masü saka

Turkey linükia anünglen nungi bomb amshia Khristantem amaker.

Iraq semdangba mapang nung Pope Francis-isa Khristantem indang kiojen meyipa agütsütsü atema mepishia liasü.

Iraq Ato kilonser, Mustafa Al-Khadimi-i, tawa Pope Francis-i linük semdangba mapang nung pai temeim aser taremsüktep osang proka liasü, ta ashi.

Pope-i semdangba sülen Ato kilonseri linük nung melung masüba telok balala den shisa lemsateptsü atema senden ayongzüka menogo.

March ita nung Iraq semdangba mapang Pope Francis-i Iraq sorkar ketdangsertem aser nüburtem dang, linük nung tesünep aser terenlok alitsü atema senso ajak kasa züngshitsüla, aser yimchi-yimjung ajungkettsütsü

atema maneni inyaktsüla, ta ayongzüka liasü.

Pope-i anogo pezünü Iraq semdangba mapang pai, "Adianu ama tesünep nung alitsü atema ken o jembitsüla, judiciary-i ibaji kümzüksüla aser ozüing akhümtsübuttsüla," ta ayongzüük.

Pope-i ketdangsertem dang, "Ni sasaseta aser mangyima yagi aruogo, kodak nung aliba Tebu dang ni tatok meshitsür. Yimjung Chuba Yisu Khrista tenüing nung ni yimjung sangdonger ka ama yagi aruogo," ta metetdakja liasü.

Secular lenirtem den jembidang Pope Francis-i linük nung Khristantem reshikangshiba indang süoka jembi aser Khristantem temeden atema inyaktsü mepishia linük tanaben asentenshia yangerba nung Khristantemia pei dak aketba sempet amshitsü, ta ashi.



Easter külemi among. Tanur 32 den superintendents iba sentong nung aden. Assam Rifles-i parnok den iba anogomong amongba atema parnok dang pelaba lemsatöp.

April 04, 2021- Easter anogo nung HQ IGAR (North) kübok Assam Rifles Jalukie Battalion-i Peren District nung aliba orphanage homes nungi tanurtem den Easter Sunday amongdang tangokba noksa nung angur. Lydia Centre & Childrens Home aser Christian Servanthood Ministry (CSM) orphan home nungi tanurtemi

ANOGO ABEN TSÜNGREM DEN

Kibuba teka

"Kechiyong nenok asoshi kü sentong ni meteta lir, oda tamajung asoshi masü, tesülennenok nem teimla agütsütsü, yimjung indang tebilemba ta kibubai ashir." (Yer. 29:11)

America's Got Talent episode ka nung tetsür kati mashilen nungi noksa ka yanglua sayu. Saka lai yangluba noksaji asüksaba ama dang tetendangertemi angu nung tetendangertem ajaki bottom temerem ka nung anem. Saka kodang lai yangluzüker noksaji meyip idangji tetendangertem dang masü, saka iba sentong nung adener aser TV nung repranger ajak süngmang kechiyong lai nisung jak ka kanga junga yangluba ka liasü. Tetendangtem kanga sasa liasü, kechiyong parnok noksa yanglula teka sempetji mangu liasü. Tsüingremi asen taküm yanglubaji tesüingmangtsü ka lir. Tensa mapang kar nungbo aseni rajema angatetsü makokba tensatem tenjir. Iba mapang aseni ashir, "ya kechi akümtsüba?" "kechi ka nung tembangtsü?" Terata sülen terata mapang tenjir. Item mapangtem ajurua ka kibuba sentongji tajung nungsa tembanger. Tejen Lai nung Hanna taküm nunga terata mapa talangka liasü. La nungi tanur mesosemba agi la mapang talangka mulungzürep nung liasü, saka tesülen Kibubar sentong tajungji lai ngutet. La nem putir Samuel dang masü saka ano maneni jala jabaso jenti moatsü. Aseni Tsüingrem sentong aika asen taküm nung mangatetsü akok. Saka nai terata, kechiyong pai kodanga aibelen masür. Tsüingrem teka jagi asen taküm noksa kodanga tamajung meyanglutsü. Nai tamang nung ajema teli.

Sarasadem

Kibuba Yisu ne sentongtem mejangja-aka, ni ne teka nung maneni amanger. Amen

Gujarat nung anti conversion ozüing tasen ka agizükogo

New Delhi, April 05 (Agencies): Bharatiya Janata Party (BJP)-i yimsüsüba state-Gujarat nung kangshia mesüra ashikülak agi tamangba yimsü meyipdaksüba nokdangtsü atema anti conversion ozüing tasen ka agizükogo.

April 1, 2021 nü Gujarat Freedom of Religion (Amendment) Bill 2021 agizük, aser iba ozüing kübok aibelenertem küm 3 nungi 10 tashi tepuokdak ayutsü aser senchi lakh 5 tashi achitsü.

Osangbener den jembidang Jesuit Arogo nung putir aser meimchir temeden atema inyaker, Cedric Prakash-i, "Gujarat sorkari ano sayangtetogo. 2003 küm agizükba ozüing yanglushiba ya temzüing alema lir. Temzüing alema yangluba ozüing ya tangsa agientsüla," ta metetdaksü.

"Uttar Pradesh aser Madhya Pradesh ama state tem nung tashi alia amshiba aser nüburtem anemba yimsüsüba lir, aser item states nung sensotem temeden agientsür," ta pai ashi.

"Tanü asenoki state sorkar dang iba ya asüingdangtsüla-kechiba teintet senso kati pai/lai amangnüba tamangba yimsü mamangteter, mesüra iba atemaji senso kati pai/lai kibong kümmertem den kibong akümtsü atema kechiba telemtetba magiteter?" ta pai asüingdang.

Yaküm BJP-i yimsüsüba

states- Madhya Pradesh aser Uttar Pradesh nung kibong akümtsü atema Hindu tsürtemi Islam yimsü dangi meyipdaksütsü merangba nokdangtsü atema ozüing benoka liasü, aser Hindu right-wing forces-i iba dangji "love jihad" ta ajar.

Gujarat legislative assembly nung Gujarat Freedom of Religion (Amendment) Bill 2021 benokba mapang nung MLA, Pradipsinh Jadeja-i, "Tamangba yimsü meyipdaksütsü atema Hindu tsürtem mesüzüka kibong akümba nokdangtsü atema iba ozüing ya nungdaker. Hindu tsürtem den kibong küma yimsü meyipdaksütsü atema bendanglen nungi senotsü teyari agtsür," ta metetdakja liasü.

Iba Bill ashishia Uttar Pradesh nung Centre for Harmony & Peace nung chairman, Muhammad Arif-i, "Asen linük temzüing ajanga pei amangnüba yimsü amangtsü aser bentshitsu atema temeden agütsür, ajisüaka iba bill tasen benokba ajanga nisung ka yimsü mita reprangtsü aser iba ya meimchir temden anema lir", ta ashi.

Muslim nunger lenirisa, "State nung bill ka lir, anungji bill tasenba yabo menüingdaki liasü. Sorkari mapa manguba tebilemtsü, aya-tzüra aser sensak tia tebilemtsütem nung dang rangloker inyaktsüla," ta ashi.



Kolkata, April 5, 2021: Hombarnü Kolkata nung Sayukta Morcha teloktep nungi candidates-CPI(M) nungi Fuad Halim, Congress nungi Ashutosh Chatterjee aser Congress nungisa Sadab Khan (ajichi) nungeri külemi election nüboyim nung shilem agiba noksa nung angur.

Covid tensa tamajungba akümer; PM Modi-i CMs den jembitsü

New Delhi, April 05 (Agencies): Tang India nung coronavirus tashidak kanga prokba mapang nung Centre sorkari iba wara anema tesashiba raratsü teletetba agiogo. Brihostibarnü Ato kilonser, Narendra Modi-ia senden ka ayongzüka chief minister tem den linük nung covid tensa aser vaccination drive atema o lemtepsü. Ano külen Mongolbarnü Union health minister, Harsh Vardhan-i tang iba wara kanga bulua prokba states aser UTs 11 nungi health minister tem den senden mena tensa asadangtsü. Testüiba ghonda 24 tsüingda India nung ano nisung 1,03,558 dak coronavirus putetogo aser

linük nung coronavirus case ajak agi crore 1.25 jungogo. Modi-i Chief Minister tem den tesüsa March 17 nü senden mena liasü, aser iba mapang nungji pai chief minister tem dang iba wara asentenshir tanaben prokba nokdangtsü atema asalentong yanglua inyaksü metetdakja liasü. Amongnüa Ato kilonseri linük nung Covid-19 tensa aser vaccination mapatong asadang liasü. Osang ka ajanga ashiba agi, yaküm dang nungibo taküm iba tashidak kanga tekaraaba prokdar, ajisüaka nisung asübabo kanga agi tajemba. Tang linük nung iba wara ano sashia prokba ya nüburtemi

mask magiba aser nisung tsüingda tepila maliba densema covid anema telatetbatem mebeshiba ajanga lir. Amongnü senden nungji principal secretary to the prime minister, cabinet secretary, home secretary, chairperson (Empowered group on Vaccine Administration) aser health secretary densesema tongti ketdangser aika dena liasü. Mongolbarnü Union Health Minister Vardhan-i Maharashtra, Chhattisgarh, Delhi, Gujarat, Haryana, Himachal Pradesh, Jharkhand, Karnataka, Madhya Pradesh, Punjab aser Rajasthan states nungi health minister tem den senden mena tensa asadangtsü.

Rafale atema sübokrem amshiba bushisüngdangtsü Cong-i akhanger

New Delhi, April 05 (Agencies): France nung news portal mediapart.fr ajanga, Rafale tayimtsü yanglur Dassault Aviation-i India nunger defence company ka nem sübokrem Euro sen million 1.1 agütsüogo, ta sangdongba sülen Congress party-i iba tatalokbaji jungjunga bushisüngdangtsüla, ta takhangba agütsüogo. April 4, 2021 nü online ajanga prokba osang nungji Anil Ambani'er company tetshia mali, ajisüaka France nunger company Dassault Aviation-i sübokrem Euro sen million 1.1 agütsüogo ta metetdaksü. Hombarnü osangbenertem den jembidang Congress tongti


otongdar, Randeep Singh Surjewala-i, "Linük senpong nung takoksa anguba, sübokrem agiba aser India nunger defence atema shishilembaba nung commission agütsüba atema tai tongloktsüba maneni Modi sorkar matsüngdang lir," ta metetdaksü. French anti-corruption agency - Agence Française Anticorruption (AFA)-i bushisüngdangba ajanga bushitetba agi, India-i rafale tayimtsü alitsü atema 2016 küm tezüngzüktep agiba sülen Dassault Aviation-i India nunger company- Defsys solutions nem Euro sen million 1 agütsü ta metetdaksü.

Defsys company ya Gupta kibong indang lir, aser putu asem tashi aeronautical aser defence industries nung iba kibong nungi züngsemtemi tiyongtsü nung inyaker. Item osang nung ajemdaker Congress otongdar, Surjewala-i, Congress-i aniba UPA sorkar yimsüsüba mapang nung Agusta Westland chopper tezüngzüktep nung sübokrem agi, ta tai tonglokja liasü, anungji taoba defence minister AK Antony-i inyakyim benshia tezüngzüktepji thinentsü aser bushisüngdangtsü tuyua liasü, anungji Rafale atema-a kasaji inyaksüla, aser Ato kilonseri telangzüba agütsütsüla, ta ashi.

Maoists telungpurtem anema tesashiba raratsü: Amit Shah

Jagdalpur/New Delhi, April 05 (Agencies): Chhattisgarh nung Maoists telungpurtemi sepai 22 tepsetba sülen Hombarnü Union Home Minister, Amit Shah-i, sorkari Maoists telungpurtem anema ano tesashiba raratsü, ta metetdaksü. Amongnü Chhattisgarh semdangba mapang nung Union Minister-isa Bastar region nung asür sepaitem nem akhüm agütsüogo. Bastar district headquarters-Jagdalpur nung senden ka amenba sülen osangbenertem den jembidang Shah-i, security sepaitemi taküm tenla agütsübaji linüki kodanga mamadoktsü aser Maoists anema ano tesashiba raratsü, ta metetdaksü. Iba senden nungji State Chief minister Bhupesh Baghel, state police aser Central Reserve Police Force (CRPF) nungi tongti ketdangsertema dena liasü. Sukma aser Bijapur districts arrtsülen Jonaguda aser Tekalguda yimtsüng anasa arem nung Maoists den raradang sepai 22 asü aser 31 yiruogo. Asür 22 nungji CRPF sepai

8, Bastariya battalion nungi sepai ka, District Reserve Guard (DRG) 8 aser Special Task Force (STF) nungi sepai 6 densema lir, ano sepai kabo samar tang tashi mangur, ta sepai ketdangsertemi metetdaksü. Shah-i, "Maoists anema raraba ya manentsü, ta ni linük nüburtem dang nangzüker. Parnok anema tesashiba raratsü. Tatem nungbo asenoki takok angutsü," ta ashi. India sorkar, Ato kilonser Narendra Modi aser nübur ajak tenüng nung pai taküm tenla agütsür sepaitem nem akhüm agütsür, ta Union minister-i ashi. "Central aser state sorkartemi Maoists bulua aliba tesemtem tonga otetdar, aser ibaji ajanga parnok (Maoists) kanga jashir," ta pai ashi. Terenlok tsütsülen lenla aika nung mapa tembanga inyakogo, ajisüaka tang coronavirus wara aliba agi maparen mezülongi inyaker, ta pai ashi. Central aser state sorkartemi tribal tesemtem nung terenlok mapa inyakba dang masü saka telungpur anema-a tesashiba inyakdar, ta pai ashi.




Chenab, April 5, 2021: Hombarnü Chenab nung Chenab ayong ma nung yangluba, alima nung railway apu metong nung talangtiba terenemer dang aliba noksa nung angur. Iba apu ya Paris nung aliba Eiffel Tower dang nungi metre 35 agi talangba lir.

Jaya Bachchan-i Bengal nunger dang Mamata maneni shimtsü mepishi

New Delhi, April 5 (Agencies): Actor aser Samajwadi Party nungi Rajya Sabha MP, Jaya Bachchan-i West Bengal nüburtem dang state nung kümsük ana tashi chief minister inyakla, Mamata Banerjee maneni shimtsü ayongzüker. Jaya Bachchan-i anogo asemnü tashi Trinamool Congress (TMC) atema nübo yimtsütsü. Jaya-i, "Ni film tangoktsü atema yagi (Bengal) aru masü. Ozü party lenir Akhilesh Yadav-i iba election nung TMC yaritsü atema ni yagi yok," ta ashi. Laisa, Mamata-i la kijai tamajunger ajak anema raradar, ta ashi. Kolkata nung aliba TMC indang state unit headquarters nung osangbenertem den jembidang lai, tetsürtem kümzüka alitsü atema state

tajungtibaji West Bengal lir, ta ashi. La den taoba mapang West Bengal nung minister Purnendu Basu aser TMC nungi Rajya Sabha MP, Dola Sen nata liasü. Jaya-i, "La (Mamata) tekolak aser tetsüng yiruogo, ajisüaka parnoki la melungjang aser tokolok meyrutsütetba den külemi tejakleni oa alima nung Bengal ya tesem tajungtiba rongnung ka kümdaktsütsü atema lai inyakba menokdangtet," ta ashi. Samajwadi Party lenir, Kiranmay Nanda-ia Bengal semdanga Mamata Banerjee atema Nandigram Assembly constituency nung nübo yimja liasü. Jharkhand chief minister Hemant Soren-ia tribal nütsüng aika aliba tesemtem nung Trinamool Congress atema nübo yimtsüogo.



Rohtas, April 5, 2021: Coronavirus wara prokba nokdangtsü atema ketdangsertemi coaching institutions shibangtsüba anema Rohtas district kübok Sasaram nung kaketshirtemi longkak aitba noksa nung angur.

Bangladesh nung rong ka mekupoka nisung 26 asü



Narayanganj, Bangladesh nung April 5, 2021 nü tangokba noksa nung rong ka makeper aliba angur. Bangladesh yimtiba, Dhaka anasa Shitalakkhya ayong nung Deobarnü iba lendong ataloka liasü, aser iba lendong nung nisung 26 asüba Hombarnü tashinung jangjaogo.

Dhaka, Rongchii/April 5 (Agencies): Bangladesh kübok Shitalakkhya ayong nung nisung 100 dak tema bener aliba rong tila ka khu abenba rong tulu ka den tsüktepba sülen ayong nung mekupok, ta Hombarnü media sangdong balala ajanga metetdaksü.

Iba tatalokba ya Deobarnü nikongtsütsü Dhaka nungi km 16 shi pilar aliba Narayanganj district nung ataloka liasü.

Deobarnü rong mekupokba nung asür nisung pongu agitet aser Navy, Coast Guard, fire service aser police-i Hombarnü tasü mang 21 agiteta liasü, ta Dhaka Tribune sangdong ka ajanga metetdaksü.

Passenger abenba rong ML Sabit Al Hasan, khu abenba rong SKL-3 den Munshiganj

kübok Shitalakkhya ayong nung Syedpur Koyla Ghat kümbang nung tsüktepba sülen mekupok. Police aser tenük kuli agütsürtemi ashiba agi, rong ana tsüktepba sülen khu abenba rong ya iba tesem nungi jena oadok, ta kasa sangdong ajanga metetdaksü.

Passenger abenba rong ya Munshiganj-i oya liasü, ta osang ajanga ashi

Iba ken o bushitsü dangtsü atema additional district magistrate (ADM)-i lenisüba nung nisung tenet agi kümetetba committee ka tentettsüogo, ta Narayanganj deputy commissioner Mostain Billah-i ashi. District administration-i iba lendong nung asür kibong shia nem tasü mang aremtsü atema maparen balala achaayanga

inyakba nung intoktsü atema Tk25,000 (\$296) agütsütsü, ta paisa ashi.

Bangladesh inland water transport authority-ia iba ken o bushitsü dangtsü atema nisung pezü agi kümetetba committee ka tentettsüogo, ta osang ajanga ashi.

Passenger abenba rongnung nisung 150 benteter. Police officer-in-charge (OC) Deepak Chandra Saha-i ashiba agi, passenger tem 50 nungi 60 shi tzüküm tong tzü waa arutet, saka parnok rongnung asembo mozükidangi anir aotsüsa aküm.

Narayanganj district deputy director of fire service and civil defence Abdullah Al Arefin-i, yipru aitba ajanga tekümzü kba maparen menorang tenzükteta liasü. Tekümzü kba maparen maneni inyakdar, ta ashi.

Land mines agintsü atema Venezuela-i U.N. teyari meshitsü

Caracas, Rongchii/April 5 (Agencies): Venezuela-i parnok litsü nung rema aliba landmines tem agintsü atema United Nations dang teyari meshitsü, koba Colombian den arrtsü nung telungpurtemi rema toktsüba lir, ta tir Nicolas Maduro-i Deobarnü ashi.

Maduro-i aniba sorkari Brehostibarnü ashiba agi, Apure state nung military operation ka benoka inyakba mapang sepai ana land mine nung pokseta asü. Iba tesem nung sepai aser telungpurtem tsü ngda mangatetep adokba ajanga Venezuele nunger meyrejang aika arrtsü adena jenaogo.

Sorkari UN Secretary General Antonio Guterres dang tekaratiba nung teyari agütsütsü asoshi asü ng dangtsü, ajita asü ng dang parnoki telungpurtemi rema tokja aliba

minefields deactivate sütsütsü atema tasa ajak bener arutettsü, ta Maduro-i televised broadcast ka nung ashi.

Iba dak sendakba nung UN-i kecha telangzüba agüja mali.

Colombia tir Ivan Duque-i, National Liberation Army, mesera ELN aser FARC telungpur zü ngsemtem nem tejenokdak agütsüba atema Venezuela aitsüogo. Item teloktem yagi 2016 küm Colombia sorkar den yimjung atema tenangzüktepba yangluba sülen manidaker. Ajisüaaka Maduro-i iba taittsüba ya magizük.

Linük ana nungi Rights groups temi Bodhbarnü UN dang arrtsü nung mepetmesü adoker aliba bentettsü atema special envoy ka shimtsü ayongzü kogo. Arrtsü ya küm aika temesepba shibelenba teyongtsü kümogo.

UK nung alir ajunga dak COVID-19 tendangtsü sentong tenzüker

London, Rongchii/April 05 (Agencies): Mozü agütsüba maparen kanga arrsanga inyaka aser loktiliba tanaben lapokba mapang tashidak wara putettsü mechi England nung alir ajaki hopta nung anaben COVID-19 tendangtetsü, ta British Ato Kilonser Boris Johnson-i Hombarnü ashi.

Nübur ajunga tendangba sentong yagi tashidak menatapa aoba tesendaktep rakdangtsü aser timtem meliaka iba tashidak alirtem jangjatsü, ta Johnson-i ashi, shibai linük balala nung senzütsü tanaben mela rongsenketsü ng inyakyim

kar lapoktsü imlar.

Coronavirus tashidak azüoktsü mechi Europe nung linük timbaka lockdown tasen tenzü kshir, saka Johnson-i taruba ita nungi tenzüka tenokdangbatem salatsü sentong renema lir.

"Mozü agütsüba maparen nung asenok maneni renloka aoba mapang aser tenokdangbatem maneni lapoktsü maparen inyakba mapang ka nung meranga inyakba amajok makumtsü asoshi teti tendangtsü kanga tongtipang," ta Johnson-i sangdong ka nung ashi.

(Maneni tapak 9 nung...)

Indonesia, East Timor nung cyclone arua nisung 97 asü

Malaka, Rongchii/April 05 (Agencies): Southeast Indonesia aser East Timor kübok aliba asetkong nung tropical cyclone Seroja ajanga tzümetsü ng adokdakja aser anentsüh alua nisung 97 asü, aika kechi tia nung aliar mejangjateter aser ano nisung meyrirjang aika tesem balala nung prokshia lir, ta ketdangsurtemi Hombarnü ashi.

Indonesia indang West aser East Nusa Tenggara province kübok asetkong ishika nung hopta tatemlen cyclone den tzü ng lu tesashi arua ajungben tzümetsü ng adoka anentsüh aluba aser mopung sashia aonba sülen nisung 70 asüba osang lir, aser ano nisung 70 samar bushir, ta disaster agency BNPB ajanga ashi.

East Timor nung anentsüh aluba, ajungben tzümetsü ng adokba aser sü ng dong laoba ajanga nisung tajemba agi 27 takum sama aser nisung 7,000 shi tesem balala nung prokshia lir, ta sorkari ashi.

Lembata asetkong nung nisung tasü mang tzü agi nungzüker ao südi, ta ketdangsurtemi ashir.



East Nusa Tenggara province, Indonesia kübok Malaka Tengah nung tzü agi mobanger aliba lenmang ajanga yangji alirtem police temi anir aoba noksa nung angur. Indonesia anü doklen cyclone den tzü ng lu sashia aruba ajanga tesem aika nung lendong ataloka nisung 90 dak tema süogo aser aika samar bushir, ta ketdangsurtemi ashi.

"Tzüyim nung nisung tasü mang amshitsü atema onoki rubber boat tem amshir. Yimtsü ng aika nung nüburtem amoa orr lia ajungben tzümetsü ng adoka kongshi," ta Lembata district government nung deputy head, Thomas Ola

Langoday-i osangbener dang phone ajanga ashi.

Indonesia nung tzümetsü ng agi nisung 30,000 shi dak kongshio, kar evacuation centre tem nung jenoka lir, saka apo pongu chirepa aser sü ng dong laoa lenmang kar

zükbangba ajanga timtem nung alir kumzü kba maparen tasakba akumer, ta BNPB odongtar Raditya Jati-i ashi.

Yipru maneni aruba ajanga tesem kar nung nüburtem kumzü kba maparen anendaka lir, ta ketdangsurtemi ashi.

Nisung aliba ki noklang aika den solar power plant amala ki-o-jen aika raksatsü, ta BNPB ajanga ashi. Cyclone ajanga tzüsem ya meter 6 tashi ajungketa rong aser motor boat tem mükepokdaksü.

Timor asetkong nung aliba Malaka district kübok yimtsü ngtem nung tzü ng lu anenaka Hombarnüa tzümetsü ng maneni kanga sashia ayimer.

Yangji alirtem tzümetsü ng nungi kumzü ktsü mechi kilem kolaki atu, kong tzü ya ali nungi meter 3-4 tashi metsü ng lir.

Tir Joko Widodo-i iba lendong nung asür kinungertem den asü khu lemsatep aser timtem nung alirtem tekeratiba nung yaritsü totuyuba agütsüogo.

Hombarnep Timor asetkong southwest tsütsü Savu tzüyim nung Seroja cyclone agi kongshi, ta Indonesia tsüngsang-mopung takzürtemi ashir.

Ghonda 24 tsü ng ta cyclone tashi taitba akumtsü aser tzü ng lu tali arutsü, tzüsem tali adoktsü aser mopung tesashiba aontsü, saka Indonesia nungi pila aor, ta parnoki ashi.

AR-i Kudeh yimdak medical camp ayongzük



Tuensang, Rongchii/April 05, 2021 (TYO): Honibarnü (03.04.2021) HQ IGAR (North) kübok Tuensang Battalion indang Assam Rifles-i Kudeh yimdak, Tuensang

District medical camp sentong ka ayonga agiogo.

Iba yimtsüing nung alirtem talisa tantsü-tambu/teintet rogu, tangar memenep alir, tsürabur malir aser tetsürtem, shirnok

meta talang nung aliba mozüki moteter, parnok nem medical teyari agütsüsü nükjidong yur medical camp ya ayongzük.

Team-i temang nung timtem alirtem anepalua aser mozü agütsüba den külemi, mapang shitak nung mozü (vaccination) agitsü aser merük mejua alitsü indang tongtibangtem yimertem dang metetdaksü.

Covid-19 tetuyuba/temzüing nung anidaka iba medical camp sentong agia liasü.

Tarutsü anogotem nunga iba ama medical camp sentong ayongzüksü asoshi yimertem Assam Rifles dang mepishiogo.

Iba camp sentong nung tebur 70, tetsür 25 aser tanur 12 shi ajangzükogogo, ta sangdong ajanga metetdaksü.

'The Intern' nung Bachchan denogo

Mumbai, Rongchii/April 05, 2021 (Agencies): Nancy Meyers indang film - The Intern (2015), tanaben Hindi nung yanglutsü aliba project nung Bollywood star Amitabh Bachchan-i tongti shilem agitsü.

Deepika Padukone-i Instagram sabang ajanga film indang poster den külemi iba osang lemsatapa liasü. Mezüingbo, iba film nung Rishi Kapoor-i shilem agitsü renemer liasü, saka 2020 küm pa süadokba ajanga sentong tem melenshi.

"Co-star ka den tanaben

longjemtsü maangka anguba asoshi pelar! Hindi nung yanglutsü aliba #TheIntern mapatong atema @amitabhbachchan pelashishia agizüker," ta Deepika-i lemsatap.

Deepika, shibai taoba küm la meyong production company -

'Ka Productions' lapoka liasü, lai Sunil Khetarpal den longjemmer production tsütsü nungittsü. Iba den külemi, film atema Warner Brothers India, Ka Productions aser Azure Entertainment longjemtsü.

Amit Ravindernath Sharma-i iba film direct asütsü.

UK nung alir ajunga...

(Tapak 8 nungi...)

Tendangtsü asoshi kidangi aser mapa inyakdaki aotsü, mesüra pharmacy mesüra tendangba tesemtem nunga angutsü, ta Britain indang Health Minister Edward Argar-i ashi.

Ita pezü kanga sashia shibanger aliba nungi tanemi lapokba mapang linük nung tashidak wara tsüingsü apuba nung iba ama tendangba ya ajanga health ketdangsür yaritsü.

England nung April 12 nungi tenzüka retail, outdoor hospitality aser hairdresser tem tanaben lapoktsü imlar.

Lokti sentongtem nung vaccine passport amshitsü tendangba mapang ka nung lir.

Tang aliba sentong kübok bendanglen nungi arur ya May 17 tashi nokdanga lir.

Scotland, Wales aser Northern Ireland nunga pei pei mera agia küm tetenzüklen tenokdangba tesashi agütsüba tanemi salar.

Britain nung lanur nütsüing tesadang ka dak tema nem AstraZeneca aser Pfizer mozü agüja tensa aziüktet. Aser March ita school tem tanaben lapokaka aser tendangba tali liaka tang tashi coronavirus tashidak agi meneper tali akumba mangur.

Yachem yimdak Phom Monyu sentong agiogo

Longleng, Rongchii/April 05, 2021 (TYO): Hokolbarnü (02.04.2021) Yachem yimdak "Enriching our Culture" omen nung ajemdaker Phom Monyu den Cultural Day sentong ayonga agiogo.

Sentong balala atema tetezü balala aketba sobaliba ken aser

tsüingsangtem mamadoki benshiyonga aotsü nükjidong nung, Yachem students Union aser Yachem village council longjemmer iba sentong ayongzükua liasü.

Iba sentong nung cultural troop 12 agi sobaliba ken aser tsüingsang balala sayua shilem agiogo.



OFFICE OF THE
MAREPKONG YOUTH ASSOCIATION

Registration No.DYRO/125/11-9-08

Mokokchung : Nagaland.

"Towards Excellence"

PELABA LEMSATEPER

2buba Mokokchung Inter Ward Football Tournament indang Organizing Committee aser Marepkong Youth Association tenüing nung, March 09 nungi March 20, 2021 tashi 2nd Mokokchung Inter Ward Football Tournament takok ngua agitetba asoshi tsüinglanglen agüja aliba lokti/kija den pelaba lemsateper:-

1. Shri. Sharingain, Speaker, Nagaland Legislative Assembly
2. Shri. Imkong L. Imchen, MLA
3. Shri. Imnatiba MLA & Advisor to CM, Industries & Commerce
4. Shri. Moatoshi Tzudir, Class 1 Contractor & NDPP Active Member
5. Mr. & Mrs. Noklen Jamir, Kohima (Champion Prize Sponsor)
6. Mr. & Mrs. M. Limameren Jamir, Sangtemla Ward (Runners Up Sponsor)
7. R. K. Enterprises, Sewak Gate, Mokokchung (Individual Prizes)
8. Dr. Sanen Jamir, Veterinary Surgeon, Mokokchung
9. Dr. Sashiyangba, District Project Officer, Deptt. of Land Resources, Mokokchung
10. Er. & Mrs. Tongpangyanger PWD
11. Er. & Mrs. Takayangba
12. Mr & Mrs K Bendang
13. Ms. Moasola Lkr Tongdentsuyong
14. Marepkong Baptist Church
15. MDFA/MDFRA
16. All Ward Union, Mokokchung President & Colleagues
17. All 18 Wards Chairman & Executives
18. All the participating Ward Teams/Coaches & Managers
19. Press Club, Mokokchung
20. Ao Milen and Tir Yimyim Media Partner
21. Mokokchung Sports Store (Official Football Sponsor)
22. Deputy Commissioner, Mokokchung
23. Superintendent of Police Mokokchung
24. Chief Medical Officer, Mokokchung & Team
25. Nehru Yuva Kendra, Mokokchung
26. Shisatsü/rongsen aser nübo agi yariba atema kija aser tentet ajak dang.
27. Roko Angami, President, Nagaland Football Coaches Association, Kohima; Diethozotuo Meya Coach, NFCA; Zakietuolie Khro Coach NFCA aser Nungsangyanger Lijaba Lijen, Ward, Mokokchung, shirnoki 2nd MIWFT sülen Football coaching camp Imkongmeren Sports Complex nung March 22 nungi March 27, 2021 tashi takok ngua agitsü asoshi bendanga agüja yariogo; iba den külemi Watimenba Longchar Jnt. Scy. NFCA i/c. Mokokchung aser Lepzungchiba Coach NFCA na arua adenba atema pelaba shisemer.

Sd/-
BENDANGSUNEP
President MYA

Sd/-
BENDANGNUKSHI
Convenor

EduVersity
NCS PREPARATION 3.0

TARGET NCS 2021

1440 HOURS OF STRUCTURED COACHING | 3000+ PRACTICE MOCKS | 40+ TEST SERIES | 730 DAYS CURRENT AFFAIRS

Enroll Now

3RD BATCH STARTS FROM 8TH APRIL

BOC | TALK TO US @ 7641007948 | STUDYNEST HOSTEL IN CAMPUS

KOHIMA AOR TELONGJEM YIMKONG MUNG DANG



Anogo : 10th April, 2021
Mapang : 1:00 PM
Tesentepdak : Molu Ki

Tongti Tejaoker : Wb. Sharingain Longkumer
Hon'ble Speaker, NLA

KETDANGPURTEM

Tir : Wb. Chiden Yaden
Tatong Tir : Wb. Chubalepuk Ao
Tongti Zulur : Wb. Moameren Imchen
Repsem Zulur : Wb. I. Lanusanen Jamir
Sen Zulur : Wb. Pangertoshi Pongen
Kimen : Dr. K. Aochuba IAS (Rtd.)

SENTONG

1. Menden : Ketdangpurtem
2. Menden Okila : Wb. Chiden Yaden, Tir KAT
3. Lai zunga sarasademtsu: Rev. Sentsashi Aier Sr. Pastor KABA
4. Ni ya shinur : Wt. Chubasangla Longkumer (7 Min)
5. Sobaliba Ken Ka : Langpangkong Senso Telongjem Kohima
6. Tajungshi O : Wb. Dr. Sashimeren Aier (7 Min) P.D, Health & Family Welfare (Rtd)
7. Ken Ka : Sp. Kumtanzukba Jamir
8. Tongti tejaoker O : Wb. Sharingain Longkumer Hon'ble Speaker, NLA (20 Min)
9. Osangtem agitsu : 1. Tongti zulur
2. Sen-O-tsu zulur
3. Molu Ki
4. Ao Arju ki Construction Committee
5. Kohima Aor Officer Telongjem
6. Kohima Watsu Telen
7. Ao Students' Union Kohima
8. Nungtet Luden
10. O Lemtepba mapang :
11. Menden melentepba mapang : Wb. R. Wati Imchen Convenor, Nungtet Luden
12. Tetoktsur menden O : Wb. Chiden Yaden, Tir KAT
13. Melepzung O : Wb. Chubalepuk Ao, Tatong Tir KAT
14. Tatem Sarasadem : Telok

TEMETETTSU

- *Sentong temer lokti chiyongtsu.
- *Sentong mapang Kohima Longiang Kaketshir Telongjem-i achaayangtsu.
- *Iba sentong nung Aor ajak sungpu nungi puti tashi sobaliba sobutsu nung aru-a atentsu metetdaksur.

Tokyo Olympics atema Indian shooting team sangdongogo

Rongchii/April 5, 2021 (Agencies): Olympic atema Shooting achaayanga telok, National Rifle Association of India (NRAI)-i Hombarnü July ita asayatsü aliba taruba Tokyo 2020 Olympics atema India nung asayar 15 sangdongogo.

Deobarnü nikonngtsütsü senden amenba sülen Selection Committee-isa, reserve shooter 14 shimba sangdongogo. Covid-19 wara pokteter aliba ajanga reserve shooters shimtsü asoshi NRAI tir, Raninder Singh-i taoba ita benoka liasü.

Tetsür 10M Air Rifle asaya nung world number one Elavenil Valarivan kijai National Team team-i kokteter aliba quota 15 rongnung ka danga kokteta mali, ajisüaka la team nung shimogo. La iba asaya nung Anjum Moudgil-i kokteter aliba quota amshitsü.

National Selection Committee-isa, tetsür 25M Pistol asaya nung Chinki Yadav-i kokteter aliba quota ya 50M Rifle 3 Positions event nung taoba World Champion Tejaswini Sawant den Anjum Moudgil asayadaksütsü atema melenteptsü telemtetba agiogo.

Linük nungi asayartemi kokteter aliba quota ya melenteptsü.

Tetsür 25M Pistol asaya nung Manu Bhaker-i tawa tajungba asayatetba sülen Committee-i, la tetsür 10M Air Pistol aser 25M Pistol kija

asaya nung asayadaksü nung ajungtsü ta bilemer.

Maneni Anjum Mixed Air Rifle Team tetoktepbba nunga Deepak Kumar den India team tanabuba ama tokteptsü. Elavenil aser Divyansh na mezüngbuba team asütsü. Anungji Apurvi Chandela tetsür 10M Air Rifle kija asaya nung dang tokteptsü.

NRAI Selection Committee senden ya April 4 nü 1 ako nungi tenzüka A-8, Nizamuddin East, New Delhi nung agi liasü.

India team yamai alitsü:

10M AIR RIFLE MEN

1. Divyansh Singh Panwar
2. Deepak Kumar
Sandeep Singh - Reserve Shooter

Aishwary Pratap Singh Tomar - Reserve Shooter

50M RIFLE 3 POSITION MEN

1. Sanjeev Rajput
2. Aishwary Pratap Singh Tomar
Swapnil Kusale - Reserve Shooter

10M AIR PISTOL MEN

1. Saurabh Chaudhary
2. Abhishek Verma

Shahzar Rizvi - Reserve Shooter

Om Prakash Mitharval - Reserve Shooter

10M AIR RIFLE WOMEN

1. Apurvi Chandela
2. Elavenil Valarivan

Anjum Moudgil - Reserve

Shooter

Shreya Agrawal - Reserve Shooter

50M RIFLE 3 POSITION WOMEN

1. Anjum Moudgil
2. Tejaswini Sawant
Sunidhi Chauhan - Reserve Shooter

Gaayathri N. - Reserve Shooter

10M AIR PISTOL WOMEN

1. Manu Bhaker
2. Yashaswini Singh Deswal

P. Shri Nivetha - Reserve Shooter

25M SPORTS PISTOL WOMEN

1. Rahi Sarnobat
2. Manu Bhaker

Chinki Yadav - Reserve Shooter

10M AIR RIFLE MIXED TEAM

1. Divyansh Singh Panwar
2. Elavenil Valarivan
1. Deepak Kumar
2. Anjum Moudgil

10M AIR PISTOL MIXED TEAM

1. Saurabh Chaudhary
2. Manu Bhaker

1. Abhishek Verma
2. Yashaswini Singh Deswal

Logo agintsü atema Moeen Ali-i masüngdang: CSK

Rongchii/April 5, 2021 (Agencies): England all-rounder Moeen Ali-i, pa tamangba yimsüi yi tenokdangba agütsür asünung pa indang jersey nungi sponsor logo kar agintsü atema Chennai Super Kings (CSK) management dang mepeshia asüngdangogo, ta osang prokshiba sülen CSK CEO Kasi Vishwanathan-i Hombarnü Ali-i temepeshiba kecha magütsü ta ashi. Osang ajangsa Super Kings-i, logo agintsü atema Moeen-i mepeshiba agizükogo, ta metedaksü.

"Iba ya osang tai aser shingaiya iba onük mebenok," ta

V i s h w a n a t h a n - i indianexpress.com dang ashi.

"Asayar mesera onoki iba indang mejembi aser iba amala logo agintsü atema temepeshiba kecha mali," ta pai ashi.

Ali, shiba Muslim nung lir, pai national team mesera domestic club nungi asayaba mapang alcohol brands indang logo pa indang jersey nung minoker. CSK indang jersey nung SNJ 10000 indang logo lir, koba Chennai nung amendaker aliba SNJ Distilleries beer brand lir.

Moeen Ali, taoba season Royal Challengers Bangalore nungi asayaa liasü, ajisüaka pa

taküm Chennai puri crore 7 agi alizükogo.

Taoba mapang Ali-i taoba India captain MS Dhoni lenisüba nung asayatsü yongyaa ataba lemsatepogo.

"MS kübok asayaba asayartem den ni sensaksemogo aser parnoki kü dang pai asaya ajungkettsüba indang lemsatepogo. Captain tajung kati asaya ajungkettsür ta ni amanger," ta Moeen-i ashi.

"MS kübok asaya atema asayartem ajaki jangrar ta bilemer. Pai asayartem peisasa dak temulung lema kümdaksür aser asayatsü atema jangja kümdaksür," ta pai shisem.



13buba Open Naga Wrestling Championship atema osangbenertem den sensaksemba sülen NWA ketdangsurtem tangokba noksa nung angur. Taküm iba asayamung ya Chakhesang Wrestling Association-i achaayanga April 9 nü asayatsü. Asayamung nung category ana nung asayatsü atema asayar 77 züngoksemogo.

Dubai Para Badminton asayamung nung Pramod-i Gold 2 angu

Rongchii/April 5, 2021 (Agencies): World No.1 Pramod Bhagat-i, Dubai Para Badminton asayamung SL4 category nung gold nguogo. Final asaya nung pai Deobarnü külem India nung asayar Kumar Nitesh koka liasü.

Final asaya nung Nitesh-i Pramod kanga nongshia asaya aser asayar ana tsüngda rally tajung kar asayaba nguogo. Ajisüaka Pramod-i asaya nung rangloker asayaa 21-17, 21-18 agi Kumar Nitesh koka gold angu. Pramod-i iba asaya ajanga kechiba pa alima nung asayartem rongnung temaba jenjang nung lir aji sayuogo.

Kasa mapang nung Pramod aser Manoj Sarkar nati SL4-SL3 tarep asaya nung külem India nung asayar Sukant Kadam aser Nitesh Kumar na koka gold angu. Iba asaya minute 29 tashi kanga toktepa asaya saka tatem nung Pramod

aser Manoj nati 21-18, 21-16 agi asaya akok.

Maneni Pramod aser Pala Kohli nati tarep temeyoktepbba asaya nung bronze medal nguogo. Pramod-i 3buba Dubai Para Badminton asayamung nung gold ana aser bronze ka ngutetogo. Pai pa asayaba category ajak nung medal koka koktetogo.

Kasa asayamung nung world No.5 Sukant Kadam-i SL 3 kija final asaya nung France nung asayar Lucas Mazur mekoki silver dang angu. Mezüngbuba asaya nung Sukant-i meyilongi asaya tenzüker aser asendenshir junga asaya ao ajisüaka tia maka 21-15 agi tamakok angu. Tanabuba set nungbo Mazur-i Kadam dang nungi kanga agi tajungba asayateta 21-6 agi asaya akok. Sukant-i iba asayamung nung silver medal ana nguteta liasü.

Quinton de Kock maittsüsüla: Tabraiz



Rongchii/April 5, 2021 (Agencies): South Africa aser Pakistan na tsüngda tanabuba ODI asaya nung Pakistan nung opener Fakhar Zaman run out sütsüba sülen South Africa nung wicketkeeper-batsman Quinton de Kock nisung aikati aitsüdar. Taoba mapang asayar Shoaib Akhtar aser Waqar Younis nung densema nisung aikati iba run out ya 'fake fielding' rule nung aibelen ka asü ta ashishiogo. Taittsüba balala adokba sülen SA nung asayar Tabraiz Shamsi-i tatalokba indang jangjashija nüburtem dang tesempatem anentsü aser QDK dang kecha meshi toktsütsü shiogo.

Shamsi-i ashiba agi, De Kock-i asaa Zaman minprongsü merangba masü, saka non-striker end nung teyari agütsütsü atema fielder dang asüngdangba dang liasü. Paisa, batsmen-i run tembanga asemstsü melena meyiper repranga kazüra iba atema De Kock dak tai metongloksütsü, ta bilemer.

Ball talangka ontokba nokdangtsü atema anatsülen teyari agütsütsüji cricket asaya yimya lir, ta pai ashi. Shamsi-isa, tanga tweet ka nung Zaman nem tenüngsang agütsü, shibai ball 155 nung run 193 yanglua Pakistan nem run 342 arishiba nung timla agütsü.

Kasa mapang nung Zaman-ia pa out asüba ya Quinton de Kock tai masü ta shiogo. "Ni aibelenba agi ni out asü, ni Haris Rauf atema teblemstsü kaa pa repranga liasü, kechiyong pa crease nungi tera menor apuso, anungji pa timtem nung alitsü ta bilemer," ta arishi küm 30 tain asayari ESPNcricinfo dang asaya tembangba sülen ashi. Zaman-i otsüsütsüsa kanga junga asayaka Pakistan-i iba asaya run 17 agi makok. Iba asayamung nung team anapronglai asaya koka koka lir aser April 7 nü SuperSport Park, Centurion nung takoker jangjatsü.

BILEMDANGANG

Kokra temeim mapa
inyaktsü tenongnang.